

**Pasport Keselamatan** – Program latihan yang dikendalikan bersama Institut Keselamatan dan Kesihatan Pekerjaan Negara (NIOSH) ini khususnya, mensasarkan kakitangan kontraktor bagi memastikan kontraktor baru dan sedia ada menerima pengiktirafan kecekapan dan kelulusan.

Dalam pada itu, Sarawak Energy memastikan hubungan bersama NIOSH terus kukuh, sekaligus mengadakan latihan keselamatan dan kecekapan terutamanya bagi pekerja yang bertugas di tempat yang tinggi, dalam bidang pengangkutan, kakitangan pensuisan, teknikal dan sebagainya.



Ketua Pegawai Eksekutif Kumpulan Sarawak Energy Sharbini Suhaili dan Pengerusi NIOSH, Tan Sri Datuk Seri Lee Lam Thye meneroka potensi kerjasama berkaitan keselamatan di tempat kerja



Berkomunikasi dengan kontraktor untuk memastikan kerja-kerja dilakukan dengan selamat

## Utamakan Keselamatan Anda

Amalan waspada yang sangat tinggi amat diperlukan terutamanya ketika kerja-kerja pemasangan sedang dilakukan, melibatkan kabel elektrik bervoltan tinggi selain di pencawang bagi mengelakkan sebarang kemalangan akibat renjatan elektrik mahupun loncatan elektrik.

Loncatan elektrik berlaku apabila tenaga elektrik ‘melompat’, tanpa sentuhan langsung dengan kabel elektrik atau konduktor dan boleh mengakibatkan lecuk yang teruk atau tragedi kehilangan nyawa. Jarak keselamatan yang diluluskan bagi kabel tali atas elektrik adalah sekurang-kurangnya 4.6 meter (15 kaki).

Sehubungan itu, Sarawak Energy berusaha untuk terus membina kesedaran dengan mengeluarkan peringatan secara kerap melalui media cetak, kempen radio, mengadakan pameran dan mengedarkan risalah. Program di sekolah-sekolah juga diadakan untuk memupuk kesedaran, selain mengajar orang awam melalui ceramah keselamatan mengenai bahaya elektrik, beserta peringatan untuk sentiasa mengekalkan jarak yang selamat daripada infrastruktur dan kemudahan bervoltan tinggi mereka.

Ceramah ini ada kalanya diadakan dengan kerjasama agensi lain antaranya Unit Keselamatan Negeri di Jabatan Ketua Menteri, Unit Merinyu Elektrik (EIU) di Kementerian Utiliti, Jabatan Bomba dan Penyelamat dan Radio Televisyen Malaysia (RTM).



Sarawak Energy mengadakan taklimat keselamatan di sebuah rumah panjang

## Kontraktor

Semua kontraktor yang terlibat perlu mengikuti garis panduan yang telah disediakan ketika menjalankan sebarang projek kepunyaan Sarawak Energy. Taklimat keselamatan bersama kontraktor dan pemantauan tempat kerja dilakukan secara kerap terutamanya yang melibatkan voltan tinggi atau pemasangan elektrik. Antara program lain termasuk “Tool Box Talks” bersama kontraktor, sesi dialog dengan sub-kontraktor, lawatan keselamatan di tapak projek dan pemeriksaan keselamatan bersama dengan kerjasama DOSH.

Sekiranya terdapat sebarang kesalahan di mana-mana tapak projek, Arahan Pemberhentian Kerja akan dikeluarkan oleh Jabatan Keselamatan dan Kesihatan Pekerjaan bagi memastikan syarat-syarat kontrak dan tender terlebih dahulu dipenuhi. Pada masa sama, kontraktor sentiasa diingatkan supaya mengambil langkah berjaga-jaga sebelum melakukan sebarang kerja di lokasi yang mempunyai kabel tali atas elektrik atau kabel bawah tanah.

Ini bagi mengelak insiden jentera berat dan pengangkutan tinggi tersangkut pada kabel tali atas elektrik bervoltan tinggi, juga kerosakan pada kabel bawah tanah ketika kerja-kerja menggali dilakukan, berulang. Selain mengambil berat keselamatan pekerja dan orang awam, ia juga bagi mengelak sebarang gangguan bekalan yang mengakibatkan kesukaran kepada pelanggan Sarawak Energy.



Kecuaian ketika kerja menggali boleh merosakkan kabel bawah tanah



Jentera berat tersangkut pada kabel tali atas



Pemindahan tiang utiliti tanpa kebenaran boleh mengganggu bekalan elektrik

Sarawak Energy juga telah memasang penanda atau mendirikan papan tanda bagi mengenal pasti pembinaan pencawang, menara pemancar, dan tali kabel elektrik yang merentas sungai sebagai amaran terhadap kapal-kapal yang melaluinya.

## Menjadikan Keutamaan Satu Nilai

Apa pun, matlamatnya di sini adalah supaya semua yang terlibat mengutamakan keselamatan mengatasi segalanya. Namun bagi ia terlaksana, amalan ini perlu terlebih dahulu dipupuk menjadi satu nilai, berbanding menganggap ia hanya satu peraturan yang perlu dipatuhi. Hanya dengan itu, prinsip keselamatan menjadi tabiat yang berpotensi menyelamatkan nyawa anda, juga mereka di sekeliling.



“Matlamat utama Sarawak Energy adalah untuk memastikan aspek keselamatan tersemai dalam hati dan minda setiap insan yang terlibat di setiap peringkat perniagaan kami”

Sharbini Suhaili  
Ketua Pegawai Eksekutif Kumpulan

**EVERYBODY GOES HOME SAFELY**

Sarawak Energy mengucapkan selamat bercuti dan utamakan keselamatan